


西域考古錄



蜀及銅

山域

大興朱英

西域考古錄序

俞君茂才浩與予同里客久於齊著書自娛稷下古著書地乃鄒衍大瀛海多不經語君著西域錄爲有用書觀其開首三四卷如蘭涼甘肅西寧以內地而曰西域謂四郡置自漢武卽武威酒泉敦煌張掖與王莽所置之西海在漢以前亦係月氏烏孫及匈奴之地在今日則五郡爲西域根本守西域必守五郡守五郡卽所以守西域而知著書之意爲重邊防非矜博識孫子有言知彼知己百戰不殆不知彼爲五將失道李陵以敗知

西域考古錄

彼爲他道厲度班超以勝漢世張騫而後繼以班超皆能窮臨西海備其風土傳其珍怪於是西域五十餘國納質內屬故考古當自漢始魏晉六朝史雖有傳不皆通道李唐征服爲國無多五代及宋莫勤遠畧附錄與傳僅據傳聞至於有元而漢唐以來相傳之國并兼殆盡明永樂中鄭和以舟師入海所歷之國備載明史本朝則蕩平準部勘定回疆綏服西屬國通道俄羅斯有

欽定西域圖志五十卷其軼乃時時見於他說西域諸

國二千年來遞興遞滅泥古證今時務以失故自書史
外又必旁搜夫近代諸家之著述顧籍籍云云采摭成
書不有斷制何殊鈔胥方言連蹇譯瘠且聾音轉字異
於誰適從羣言淆亂自我折衷穿鑿貽誤有罪無功此
錄則於地名有誤雖水經注一統志元史亦刊其謬道
里無差雖說部如西游記亦取其長遍該細素實事求
是於是邊塞之險要疆域之沿革今昔之形勢攻守之
難易縷析條分瞭如指掌采伐其中則地無遁形敵無
遁情守能得地戰不失利唐賈耽表獻四夷述云伏波

西域考古錄

二

聚米開示衆軍鄼侯圖書方知阨塞此物此志也丁未
春三月知東昌府事同里朱錦琮序

西域考古錄自序

學士大夫生際夷途幸以文學高等策名承明之廬優游玉堂廻翔石渠縱觀先代之籍伏讀中秘之書測地輿之至蹟仰天章之煥乎出其聰明通其志氣鉤稽於盟府狄鞮考索於山川形勢比事屬辭以成一家之文字豈非當世奇作爲通人所不棄者哉浩伏處草莽樵味寡聞有志述作慙非其倫竊見國家聖武神功追蹤軒羲

高宗皇帝奮戡亂莖戎撻伐之天威平和卓而殪準夷西域考古錄

行國而土著之羶帳而棟宇之視大宛如天厩列亭障至濛池疆以戎索無思不服皆將於是乎東於是乎西於是乎南於是乎北乃徵博望之鹽澤辨篤實之火敦臨西海登昆侖謂二萬里爲國西門恭讀欽定西域圖志五十卷專紀準回兩部與其設施號令山川風土但一覽未可悉數况王會所圖職方所紀其得讀未見書者又奚能遍及乎遠方寒士是則私家著述下里謏聞當亦君子之所取而不遺其勤如浩所見彭氏之西域地形訓顧氏之方輿紀要常氏之行國風土記謝氏之

戎幕隨筆及西北域記七氏之西域聞見錄戴氏之水
地記萬氏之河源彙考孔氏之胡注拾遺和氏之烏斯
藏賦圖氏之使俄羅斯記董氏之外藩圖說杜氏之藏
行日記松氏之西招圖記三州輯覽札氏之喀爾喀使
記紀氏之烏魯木齊賦徐氏之西域水道記錢氏之秦
邊紀畧洪氏之乾隆府廳州縣志祁氏之西陲紀畧西
域釋地魏氏之海國圖志及聖武記凡若干種彼皆世
所稱宏覽博物君子而其鴻筆麗藻又足以副之宜其
具才學識三長而可上配乎良史然而志西域者未易

西域考古錄

二

論矣自漢武至於今二千餘載片瓦頽垣中具史書數
百萬言魏晉以後大亂屢屢如蠕蠕高車吐谷渾以及
東西突厥回鶻吐蕃其吞噬蓋無異於厄魯特之狺狺
泊乎有元西踰葱嶺東迄玉門郡縣諸國一變而爲封
建維藩至此而漢唐以來相傳之國名與其子孫遂刻
削而百無一存而况乎史官失職事跡全湮者哉諸君
所載非無典要沿革多乖混淆難曉或種非同類尙襲
先稱地異舊邦猶仍昔號或逞臆而失之誣或鑿空而
長其傲或踈於援据或少所發揮事實易舛考證尤非

苟因循而弗改附會而不違其能使後之人齊其口而
勿肆詬譏乎用敢按訂諸籍總撮前聞臆思其迹堂鞞
其文作爲西域考古錄若干卷竊效吳會糾繆之例俾
他日獲附諸君之後是則斯編之初志也夫道光二十
七年春二月海鹽俞浩

西域考古錄卷第一

海月堂雜著

海鹽俞浩 湛持

蘭州府

管州二 狄道州 河州

管縣四 皋蘭 金縣 渭源 靖遠

禹貢雍州之域古西羌地也秦爲隴西郡漢昭帝六年分隴西張掖以爲金城郡今州卽金城郡之舊地也前漢書應劭曰初築城得金故曰金城臣瓚曰稱金取其堅固也故墨子曰金城湯池一云郡在京師之西金西

西域考古錄

卷一

一

方之行王莽曰西海後漢建武十三年省金城入隴西明帝復立魏晉因之前涼張軌分立晉興郡張寔增置廣武郡後魏仍屬金城郡後周因之隋初立爲蘭州總管府取皋蘭山以爲名也大業罷州爲金城郡唐平薛舉復爲蘭州置都督府明慶元年罷爲州天寶初亦曰金城郡乾元初復故寶應後陷於吐蕃大中五年沙州防禦使張義潮發兵略定其旁瓜伊西甘肅蘭鄯河岷廓十州於是河湟之地盡入于唐宋復置蘭州金因之而以州治蘭泉縣省入元亦曰蘭州明初降爲蘭縣成

化十四年復升爲州領縣一

皇朝仍爲蘭州隸臨洮府今升爲府爲甘肅省會陝甘總督駐焉東界隴西縣西界閬門番南界岷州北界平番縣

前漢金城郡統縣十三宣帝又置屬國以處降羌蓋兼今日西寧青海有之而狄道不與也地大物博自漢以來河西雄郡爲第一豈非以其介戎夏之間居襟喉之要耶自金行中替五涼雲擾金城左右蓋無一日之安雖以隋唐之強盛未嘗不視金城爲河隴安危之本肅

西域考古錄

卷一

二

代以後陷于吐蕃以憲宗之英武不能復河湟五代之亂無足論矣宋元豐間始城蘭州元祐初夏人復來求地朝議欲割以畀之孫路言自通遠至熙州劣通一逕熙之北已接夏境今自北關瀕大河城蘭州然後可以扞蔽若捐以與敵則一道危矣穆衍亦言蘭州棄則熙州危熙州危則關中震動唐失河湟警及京都今若委之蘭州悔將無及遂不果棄有明州城以北朔騎所涉恒憂蹂躪故于州置重兵以資保障我

朝因之多所裁省順治初涼州有丁國棟之亂康熙中

平涼有王輔臣之變攻陷州城殺略官吏與大兵相距二三年迺定至乾隆四十三年復有回民蘇四十三之亂攻破河州直犯州城據龍尾華林兩山大學士阿桂討之旬浹始平於是奏以固原總兵駐河州以控番回移督標右營于華林以犄角州城未幾而其党田五復聚衆石峯堡地巖險四繚攻之多傷乃絕其汲道困之自春至秋僅而克之夫非我族類其心必異今隴右河湟回民多與羌虜雜處州縣以

累朝之德化不能革其舊俗食桑菹而好音葢難言之西域考古錄 卷一 三
矣狼子野心使之聚族而處當 國家承平彼何敢肆一旦猝有動搖相因而起蘇田之亂不但華林石峰爾也往者丁逆之叛關內外諸回蠡起應之其氣焰數倍蘇田以開國之師武臣力故能廓清於旬月之間以視後之克一堡而用力數倍者豈可同年而語哉愚于田五重有感也

臯蘭縣 附郭 本漢金城縣也屬金城郡前涼張寔徙郡

治理此西魏置子城縣爲郡治焉開皇罷郡屬蘭州大業初復爲郡義寧二年改五泉縣以縣境五眼泉名仍

屬蘭州咸亨復曰金城天寶初又曰五泉後廢于吐蕃
宋元豐初收復崇寧二年置蘭泉縣金省入州元因之
明初罷州置蘭縣今縣卽蘭縣舊治也蓋取臯蘭山爲
名

臯蘭山縣南五里山下地勢平曠可屯數千軍漢書霍
去病擊匈奴屯兵臯蘭山卽此今山峽有五眼泉舊志
稱霍驃姚屯兵時士卒疲渴以鞭卓地五泉湧出隋以
山名州復以五泉名縣焉

龍尾山縣南三里山形如龍尾落河壩卽狄道州北馬

西域考古錄

卷一

四

寒山之支隴乾隆四十三年逆回蘇四十三屯據此山
中屢敗官兵內大臣海蘭察奮擊敗之賊遁入華林山
卽此山也

華林山縣南三十里本樺林之譌以山產樺木得名山
勢高峻與臯蘭馬寒相鼎峙乾隆中逆回據此爲巢穴
上有華林寺爲刺麻修持大利阿桂討賊時築蚰蜒塹
絕其樵汲賊始潰然華林寺無一賊降者今移督標右
營兵于此山與城中犄角焉

瓦埠山縣南十里又其西南五里曰第一原美水草又

北十五里曰蛾眉灣爲監收善地皆臯蘭之支隴

康狼山亦名可狼山羌名熱薄漢山縣南百四十里晉義熙中西秦乞伏乾歸太子熾盤招結諸部二萬七千築城于康狼山以據之卽此山也

琵琶山縣南百三十里險峻曲折如琵琶首因名通典廣武縣有琵琶山是也北涼沮渠蒙遜恃其強陰謀圖周周擁衆保琵琶山卽此

石門山縣西南水經注灤水東北經石門山口高峻險絕對岸如門元和郡縣圖志在鳳林縣東北二十八里

西域考古錄

卷一

五

卽臯蘭山之門也元和中沙陀朱邪執宜自甘州謀歸唐循烏德隄山而東吐蕃追之沙陀自洮水轉戰至石門宋紹聖二年置平夏城於此後又築石門堡元末張良臣重修築之至成化中土達滿四劫平涼衛指揮滿璫叛入石城城在四山中東西皆石壁立數十仞無徑可入非繩梯不登西山稍平可屯千人前有小山高亦數仞山隙皆墻墻高二三丈各留小門僅容單騎城中無水有數石池由棧道引入以資汲焉城外亂山巉巖人跡稀至至滿四以射獵熟知其險及作亂遂據之

沃干嶺在縣南晉建興末劉曜等逼長安涼州張寔遣
賈騫等踰嶺入援卽此嶺也又咸和二年曜遣子允屯
狄道駿將韓璞赴救度沃干嶺而軍旣而璞遣將辛巖
督軍于金城劉允襲敗之于沃干嶺舊志云自涼州濟
河必度沃干嶺乃至狄道是也

女遮谷縣東三十五里宋李憲與苗緩城蘭州敗夏人
于此又李麻谷在縣西四十里

荔谷縣西北百八十里後漢建初二年燒當羌迷吾等
反敗金城太守郝崇於荔谷卽此

西域考古錄

卷一

六

硃砂洞縣南四十五里洞產硃砂

葵園峽縣西初平二年張溫遣周慎追叛羌邊章等於
榆中圍之章分兵屯葵園峽斷慎運道慎懼棄車重而
退

石嶮口峽縣東二十五里兩崖懸立黃河經其中東流
入金縣界

黃河流經縣北二十里河自河州流入經州城下洮灘
湟三水入焉夾河有灘宜播五穀引河灌溉甚爲民利
亦謂之金城河前漢書自金城河西西並南山至鹽澤

又趙充國傳至金城欲渡河恐爲敵所遮夜遣三校銜枚先渡渡輒營陳會明畢渡又後漢光初六年金城河水溢出二十餘里胡氏曰河流逕金城郡界自允吾以西通謂之金城河是矣

洮水縣南三十里自狄道界北流入於河涼將韓璞與劉曜子允夾洮河相持七十餘日是也

灘水縣西南十五里源出塞外流入州境合洮水又流經臯蘭山下東北流入河卽河州之大夏河矣

臯蘭水出臯蘭山在州西南三里左右翼注灘水按水

西域考古錄

卷一

七

經注灘水又東北臯蘭山水自山左右翼注灘水董氏曰當在今河州西南

湟水縣西一百八十里自西寧大小榆谷東流入境與浩亶河合流而注於河晉太元十九年符登敗死崇子奔湟中卽帝位蓋謂湟水之西也或謂之金城河

按通志云大河在州城北自河州流入境而洮灘湟三水入之攷之方志輿圖皆不能合水經注于大河東過金城允吾縣北下云金城郡治也河水逕其南不在其北兩漢地理志允吾皆金城郡治晉廢元和

郡縣圖志廣武縣前涼置廣武郡隋始罷郡置縣大業改爲允吾

音公牙

縣取漢舊名故城在縣西南一百

六十里又龍支縣本漢允吾縣後魏于此置金城縣是允吾在後魏爲廣武金城而魏收地形志並闕疑皆屬鄯州也唐廣武縣卽今莊浪廳治允吾故城當在其西南河水之北西接巴燕戎格廳界南接臯蘭縣界水經注又云南有湟水注於河而湟水下迺云湟水又東逕允吾縣北爲鄭伯津與澗水合其叙澗水又不言逕允吾縣攷之元和郡縣圖志鄯州湟水

縣郭下本破羌縣地龍支縣本允吾縣北至州一百二十五里是允吾在破羌南故下文云湟水逕破羌城南以此推之經注南字應是北字之譌今湟水自青海東北和碩特東上旗南和碩特南右翼後旗北東流逕和碩特南左翼末旗南又東入邊逕西寧縣北又東逕碾伯縣北又東南逕巴燕戎格廳東南莊浪廳西南入河在漢爲臨羌安夷破羌允吾允街枝陽境故漢志臨羌北則湟水所出東至允吾入河班氏本指縣北言之酈氏註本之班志而譌蒙上文僊

海鹽池故叙湟水有東逕西王母石室之文而忘其在臨羌西北塞外也洮水出塞外羌中班氏地志之言攷段國沙州記曰洮水與墊江水俱出強臺山山南卽墊江源山東則洮水源強臺西傾之異名也今西傾山在洮州廳西南接青海所屬蒙古境當和碩特前頭旗之東山脊南北橫亘洮水出其東曰巴爾巴必拉東南流折而東流爲洮河其西卽黃河當積石東東流折而北流又折而西北流之處迤南山脊東出有水出其陽曰祥楚必拉卽墊江源矣下會西

漢水入江山爲江河之大戒故禹貢導山以西傾爲次陰列之首今洮水自洮州廳西東南流折而東北流逕廳南又逕岷州北折北流又西北流逕洮州廳東又北流逕狄道州西又北逕臯蘭縣西河州東入于河在漢則逕隴西郡之臨洮安故狄道至金城郡之枹罕東境故漢志云臨洮洮水出西羌中北至枹罕東入河水經注灘水導源塞外羌中攷水今日大夏河唐書謂之大夏川通鑑會昌三年吐蕃論恐熱屯大夏川是也今灘水發源循化廳西南邊地東流

逕廳南又東北流逕河州南折北流逕州東及東北
入河在漢爲逕白石枹罕二縣境故漢書地理志曰
白石縣澼水出西塞外今羌人名其山曰荅蘇尔海
阿林水曰和尔藏必拉
東至枹罕入河

金縣

府東九
十里

本金龕谷縣地屬蘭州尋屬會州正大置

金州治龕谷縣元省縣入州明初改州爲縣又移今治
屬蘭州

本朝改置金縣屬臨洮府後升蘭州爲府以縣來屬焉
攷李燾長編元豐四年於蘭州南四十里龕山下置寨

西域考古錄

卷一

十

紹聖中修築寨城爲龕谷堡堡北五里有小龕河源出
龕山谷東流涵湧與浩疊河合流入黃河又於堡南十
里駝項山東南二十里鷄瓜山各置戍守與堡城相犄
角焉金人於堡西北白草原置金州升堡爲縣爲州治
焉白草原地勢平坦可屯軍卽今縣治矣

馬銜山縣西南三十里卽馬寒山形勢雄秀甲於州境
盤亘數百里與狄道州接界

猪鬃山縣西北四十里金人置鎮於此以控西夏縣南
七十里又有馬尾山